

金光明最勝王經 卷第七

無染著陀羅尼品第十三

爾時世尊告具壽舍利子。今有法門名無染著陀羅尼。是諸菩薩所修行法。過去菩薩之所受持。是菩薩母。說是語已。具壽舍利子白佛言。世尊。陀羅尼者。是何句義。世尊。陀羅尼者。非方處。非非方處。作是語已。佛告舍利子。善哉善哉。舍利子。汝於大乘。已能發起。信解大乘。尊重大乘。如汝所說。陀羅尼者。非方處。非非方處。非法。非非法。非過去。非未來。非現在。非事。非非事。非緣。非非緣。非行。非非行。無有法生。亦無法滅。然為

利益諸菩薩故。作如是說。於此陀羅尼功用。正道理趣勢力安立。即是諸佛功德。諸佛禁戒諸佛所學。諸佛秘意諸佛生處。故名無染著陀羅尼。最妙法門。作是語已。舍利子白佛言。世尊。惟願善逝。為我說此陀羅尼法。若諸菩薩能安住者。於無上菩提不復退轉。成就正願得無所依。自性辯才獲希有事。安住聖道皆由得此陀羅尼故。佛告舍利子。善哉善哉。如是如是。如汝所說。若有菩薩得此陀羅尼者。應知是人與佛無異。若有供養尊重承事供給此菩薩者。應知即是供養於佛。舍利子。若有餘人聞此陀羅尼受持讀誦生信解者。亦應如是恭敬供養與佛無異。以是因緣獲無上果。爾時世尊。即為演說陀羅尼曰

怛姪他 刪陀喇儻多喇儻 蘇三鉢囉底瑟恥哆 蘇那麼 蘇

鉢喇底瑟恥哆 鼻逝也跋羅薩底也鉢喇底慎若 蘇阿 噓訶  
慎若那末底 唄波彈備 阿伐那末底 阿毗師彈備 阿鞞毗耶  
訶囉 輸婆 伐底蘇尼室唎多引 薄虎郡社引 阿毗婆馱引 莎訶

(註十六)

佛告舍利子。此無染著陀羅尼句。若有菩薩能善安住能正受持者。當知是人若於一劫若百劫若千劫若百千劫。所發正願無有窮盡。身亦不被刀杖毒藥水火猛獸之所損害。何以故。舍利子。此無染著陀羅尼。是過去諸佛母。未來諸佛母。現在諸佛母。舍利子。若復有人以十阿僧企耶三千大千世界滿中七寶。奉施諸佛。及以上妙衣服飲食。種種供養。經無數劫。若復有人於此陀羅尼乃至一句能受持者。所生之福倍

多於彼。何以故。舍利子。此無染著陀羅尼甚深法門。是諸佛母故。時具壽舍利子及諸大眾。聞是法已。皆大歡喜。咸願受持。